

## Djevojka koja je prijavila oca u Banjoj Luci: Å½rtva maltretiranja

19/03/2009 13:37 by BanjaLukauSrcu

Djevojka prijavila oca zlostavljača, uglednog Banjalučanina koji je suprugu dvije decenije držao zatočenu.....

"Silovao pastorku", "Uhapšen pedofil", "Djevojčicu primoravao na seks", samo su neki od naslova koji se svakodnevno mogu pročitati na stranicama crnih hronika u bh. medijima. Zvanični policijski podaci su uznemirujući.

U prošloj godini na području FBiH, saznajemo u Federalnoj upravi policije, zabilježeno je deset krivičnih djela spolnog odnosa s djetetom, 41 slučaj bludnih radnji, šest zadovoljenja pohote pred djetetom ili maloljetnikom, 17 iskorištavanja radi pornografije i dva rodoskrvnača. Ništa bolje vijesti ne stižu ni iz MUP-a RS, koji je prošle godine registrirao 51 krivično djelo protiv spolnog integriteta, od čega je 15 silovanja, i to dva nad maloljetnicima, i čak 20 spolnih nasilja nad djecom.

U Sigurnoj kući u Banjoj Luci svakim danom sve je više poziva u pomoć. Do sada nisu imali žrtava pedofilije i incesta, ali redovito viđaju ozlijeđenu djecu. Sociolog ove kuće Dragana Miljević ističe da se sa žrtvama mora dugo raditi i da se posljedice nasilja kod njih uglavnom manifestiraju kroz drhtanje, mokrenje i govorne mane.

Najmorbidniji primjer u Banjoj Luci je žrtva koju je suprug čak dvije decenije držao u zatočeništvu. Slučaj je otkriven tek kada je policiju o tome obavijestila 15-godišnja kćerka Dajana S., također žrtva maltretiranja oca, inače uglednog Banjalučanina.

Stručnjaci naglašavaju da su pedofilija i incest najteži poremećaji ličnosti, a protiv ovakvih pojava mora se boriti kompletno bh. društvo. Direktor Psihijatrijske klinike Sarajevo prof. dr. Abdulah Kućukalić ističe da je najvažnije i najteže prepoznati osobu koja ima nastrane seksualne sklonosti.

- To su ljudi koji dolaze iz svih slojeva društva. Oni se žele ubaciti među djecu - u vrtiće, škole i ustanove za mentalno retardiranu djecu. Takve ljude treba provjeravati, a istovremeno treba raditi i na edukaciji roditelja i djece te mijenjati zakon i tražiti da svaki građanin bude dužan prijaviti zlostavljanje djece - kaže dr. Kućukalić.

Amra Muslić, socijalna radnica i menadžerica Fondacije lokalne demokratije - Sigurna kuća za područje Kantona Sarajevo, potvrdila nam je da je sve više zlostavljanja djece, maloljetnika i žena, sudeći prema broju žrtava koje pomoć traže u ovoj kući. Brojka takvih u kratkom vremenu se udvostručila, što je, smatra Muslić, alarm za konkretniju akciju društva.

### Imitiranje zlostavljača

Prema riječima dr. Kućukalića, žrtva u svakom slučaju trpi traumu, a najteže je ako zlostavljanje traje duži period i ponavlja se.

- Ako dijete ne dobije stručnu pomoć, ono postepeno počinje imitirati zlostavljača nad drugom djecom koja su slabija od njega - ističe Kućukalić.

I ranije je, kako dodaje, bilo incesta, ali se zbog sramote čuvalo o tome. Incest se obično dešava u izoliranoj porodici, a u većini slučajeva izvršilac je otac, kao dominantna ličnost. Obično je u pitanju psihopata, alkoholičar ili ušivalac droge.

Å Autor: E. HALAĆ - V. STEVANOVIĆ

Izvor vijesti: Dnevni Avaz